

SPORTSKI SAVEZ GRADA MOSTARA

PRAVILNIK

O IZBORU I PROGLAŠENJU NAJUSPJEŠNIJIH SPORTISTA, SPORTSKIH KLUBOVA
TRENERA I SPORTSKIH RADNIKA GRADA MOSTARA

Mostar, novembar/studenj 2025godine

Na osnovu člana 38. Statuta Sportskog saveza Grada Mostara, Upravni odbor Sportskog saveza Grada Mostara na 19. sjednici održanoj 20.11.2025.godine, d o n o s i :

P R A V I L N I K

o izboru i proglašenju

najuspješnijih sportista, sportskih klubova i sportskih radnika Grada Mostara

1. OPĆE ODREDBE

Član 1.

Ovim Pravilnikom, Upravni odbor Sportskog saveza Grada Mostara određuje uslove za izbor i način predlaganja kandidata za najuspješnijeg sportistu, sportsku ekipu, sportskog radnika, nagradu za životno djelo, te način izbora i dodjele posebnih priznanja, kriterije za ocjenu rezultata, sastav i rad Žirija za izbor najuspješnijih sportista, sportskih radnika i sportskih ekipa, kao i druga pitanja koja su od značaja za izbor.

Član 2.

Utvrđuju se slijedeća godišnja priznanja:

1. najuspješniji sportista – senior
2. najuspješniji sportista – junior
3. najuspješniji sportista – kadet
4. najuspješniji sportista – mlađi kadet
5. najuspješnija sportašica – seniorka
6. najuspješnija sportašica – juniorka
7. najuspješnija sportašica – kadetkinja
8. najuspješnija sportašica – mlađa kadetkinja
9. najuspješnija muška seniorska ekipa
10. najuspješnija muška mlada ekipa
11. najuspješnija ženska seniorska ekipa
12. najuspješnija ženska mlada ekipa
13. najuspješniji trener
14. najuspješniji sportski radnik
15. priznanje za životno djelo
16. posebna priznanja

Za jednu godinu mogu se proglasiti najuspješnijima samo jedna sportašica i jedan sportista odnosno jedna ženska i jedna muška ekipa u svakoj kategoriji.

Član 3.

Prijedlog za izbor najuspješnijih (nominaciju) mogu dati sportski klubovi, te Upravni odbor Sportskog saveza Grada Mostara.

U nominaciju za izbor najuspješnijih mogu ući samo sportisti i sportašice koji su članovi klubova registrovanih u Sportskom savezu Grada Mostara i koji su BH državljani.

Član 4.

Za sportistu godine se mogu kandidovati sportisti i sportske ekipe (član 2.) čije su međunarodne federacije uvrštene u Nomenklaturu sportskih grana i grana sporta u Bosni i Hercegovini.

Za sportistu godine, ne može se kandidovati sportista koji nastupa u takmičenjima profesionalnih federacija.

Za sportistu godine, ne može se kandidovati sportista koji je u tekućoj kalendarskoj godini (01.01. do 31.12.), bio pozitivan na antidoping testu, te je isti suspendiran od strane Agencije za antidoping kontrolu Bosne i Hercegovine.

Član 5.

Izbor sportiste godine je sportska manifestacija na kojoj se javno saopštavaju rezultati koji su tokom godine postignuti u okviru nacionalnih, međunarodnih, evropskih i svjetskih takmičenja i ima za cilj da afirmiše najviše vrijednosti sporta, fair playa, sportski duh i kolektivizam i da istovremeno potiče razvoj sporta i svih njegovih vrijednosti do najvišeg nivoa, a posebno u odgoju mlade populacije u korisne članove naše zajednice.

2. KRITERIJI ZA IZBOR SPORTISTE GODINE

Član 6.

Za izbor sportiste godine može se kandidovati (predložiti) sportista koji je učestvovao u takmičenjima koja su organizovana u okviru državnog prvenstva ili državnog Kup-a, evropskim ili svjetskim takmičenjima, olimpijskim igrama, postizanje olimpijske norme a što je definirano u Čl.14 ovog Pravilnika.

Član 7.

Na osnovu kriterija iz Čl. 14. ovog Pravilnika klubovi mogu predložiti po jednog kandidata po kategorijama.(najuspješnijeg). Prijedlog kandidata Klubovi obrazlažu sa rezultatima koje je sportista ili ekipa postigla u tekućoj kalendarskoj godini (01.01. do 31.12.), te isti treba biti potvrđen od strane državnog granskog saveza i biltena sa takmičenja.

Član 8.

Nadležno tijelo (Žiri) koji imenuje Upravni odbor Sportskog saveza Grada Mostara vrednovati će samo jedan (najbolji) rezultat, a ukoliko dva ili više takmičara ima isti broj bodova, prednost ima onaj sportista koji:

- ima medalju
- koji je bolje plasiran
- čiji je rezultat ostvaren u pojedinačnoj konkurenciji u odnosu na ekipni rezultat
- čiji se sport nalazi na programu Olimpijskih igara

Ukoliko je prvi rezultat jednak po svim gore navedenim kriterijima uzima se u obzir drugi najbolji rezultat, a ako nema drugog rezultata ili je drugi rezultat jednak, prvi rezultat utvrđuje se na osnovu boljeg rezultata koji je ostvarila nacionalna selekcija (reprezentacija) ukoliko je nastupala.

U slučaju kada su kandidati za izbor najboljeg sportiste ostvarili približno jednake rezultate, žiri prilikom donošenja konačne odluke vodi računa o ravnopravnosti sportova i sportista. Prema tom principu, činjenica da je sportista višestruki državni prvak ne može predstavljati odlučujuću prednost ako kandidat iz drugog sporta nema mogućnost da uopće postane višestruki državni prvak zbog prirode svog sporta. Na primjer, u pojedinim sportovima postoji više disciplina i državnih takmičenja tokom godine, što sportisti omogućava da osvoji više državnih titula, dok u drugim sportovima postoji samo jedno državno prvenstvo ili ograničen broj prilika za sticanje takvih titula. U takvim situacijama, žiri mora izbjegavati formalno kvantitativno poređenje i umjesto toga ocjenjivati kvalitet i značaj postignuća u kontekstu svakog sporta.

Također, u slučaju izjednačenih rezultata, važno je naglasiti da nacionalni rekord ne može predstavljati odlučujuću prednost ako se u drugom sportu takav rekord uopće ne može ostvariti (na primjer, u ekipnim sportovima ili disciplinama koje se ne mjere vremenski ili rezultatima). Ovim pravilom se želi osigurati jednak tretman svih sportista, bez obzira na prirodu sporta kojim se bave. Na taj način, odluka žirija ostaje objektivna, pravedna i utemeljena na ukupnom sportskom značaju, a ne samo na formalno mjerljivim rezultatima.

Član 9.

Ako su rezultati kandidata za izbor najboljeg sportiste izjednačeni, žiri ima pravo da, na osnovu svog stručnog znanja, iskustva i uvida u sportske okolnosti, donese konačnu odluku i predloži kandidata za sportistu godine. U takvim situacijama, žiri treba uzeti u obzir dodatne kvalitativne kriterijume, kao što su: kvalitet samog takmičenja/discipline, doprinos razvoju i promociji sporta, sportsko ponašanje, kontinuitet uspjeha, lični ugled i značaj postignuća za klub ili državu. Na taj način, žiri osigurava da odluka ne bude isključivo tehničke prirode, već da odražava širu sportsku vrijednost i značaj sportiste u zajednici.

Član 10.

Rezultati u omladinskim kategorijama (mlađi kadet-kadetkinja, kadet-kadetkinja, junior-juniorka) rezultati vrednuju se na isti način kao i seniorski sukladno kriterijima iz člana 14. Pravilnika, s tim što će biti posebno proglašeni najbolji po kategorijama.

Za sportistu godine u seniorskoj konkurenciji ne može biti proglašen junior, izuzev ako je junior postigao rezultat u seniorskoj konkurenciji.

Rezultati postignuti na YOG i EYOF se množe koeficijentom 0,9, ukoliko se sportaši koji su ostvarili određen rezultat na ovim takmičenjima kandidiraju se za sportaša godine .

Član 11.

Kandidat za sportistu godine koji nema jedinstvenu međunarodnu federaciju, u sportovima koji nisu u programu Olimpijskih igara, a ista je priznata od strane Udruženje međunarodnih sportskih saveza i drugih sportskih udruga za koordinaciju u svijetu - SportAccord - Groups international sports federations and various other associations to co-ordinate world-wide sporting. (ima niži rejting od kandidata čiji je Savez član jedinstvene međunarodne federacije, odnosno broj bodova u tom slučaju se umanjuje za 20%.

Kandidat kluba čiji Sportski savez u konkurenciji sportova koji nisu na programu Olimpijskih igara , koji nemaju jedinstvenu međunarodnu federaciju (nisu članice SportAccorda-a) ne mogu ući u izbor za najbolje sportiste ,već se istim mogu dodijeliti posebna priznanja za ostvarene sportske rezultate.

Član 12.

Žiri proglašava najuspješnijeg trenera na osnovu plasmana i rezultata sportaša ili ekipa koju je trenirao kontinuirano najmanje godinu dana. Treneru pripadaju bodovi njegovog najuspješnijeg sportiste/ekipe.

Član 13.

Najuspješnijim sportskim radnikom proglašava se osoba koja je tokom kalendarske godine svojim izuzetnim stručnim angažmanom učestvovala u ostvarenju visokih sportskih rezultata, ali i doprinijela poboljšanju uslova rada, te razvoju sporta općenito

3. KRITERIJI ZA OCJENU REZULTATA

Član 14.

Za ocjenu plasmana u izboru sportiste godine primjenjuju se slijedeći kriteriji koji označavaju

A – Olimpijske igre – OI, YOG

B – Svjetsko prvenstvo – SP,

C – Evropsko prvenstvo – EP, EYOF

D – Svjetski kup – SK

E – Mediteranske igre – MI,

F – Svjetsko studentsko prvenstvo – SSP,

G – Evropski kup – EK,

H – Balkansko prvenstvo – BP,

I – Prvenstvo BiH (pojedinačno i ekipno) PBIH,

J – Kup takmičenja BiH – K BiH.

	A	B	C	D	E	F	G*	H	I	J
	OI/ YOG	SP	EP/EYOF	SK	MI	SSP	EK*	BP	PBIH	KBIH
1	600	550	500	450	400	350	300	250	200	175
2	550	500	450	400	350	300	250	200	175	150
3	500	450	400	350	300	250	200	175	150	
4	450	400	350	300	250	200	175			
5	400	350	300	250	200	175				
6	375	325	275	225	175					
7	350	300	250	220						
8	325	275	225	175						
9	300	250	200							
10	275	225	175							
11	250	200								
12	225	175								
13	220									
14	175									
15	150									
16	125									

*Rezultati ostvareni na Evropskim kupovima boduju se isključivo ako su ostvareni u juniorskoj i seniorskoj konkurenciji.

Član 15.

Postavljeni nacionalni rekord boduje se kao prvoplasirani kolone „ H „ , evropski rekord se boduje kao prvoplasirani kolone „ B „, a svjetski rekord se boduje kao prvoplasirani kolone „ A“ .

Pojedinci i ekipe koje su postigli olimpijsku normu bodovati će se kao drugoplasirani kolone „ G „ ,

Osvajanjem duple krune u toku sezone (Državno prvenstvo i KUP BiH) bodovat će se kao prvoplasirani kolone „ H „ ,

Ukoliko kandidat iz sportova sa loptom nastupa za reprezentaciju u službenim takmičenjima boduje mu se kao prvoplasirani kolone „ I“ a ako stekne status potencijalnog reprezentativca boduje mu se kao drugoplasirani kolone „ J „.

Sportisti koji su članovi reprezentacije BIH na zvaničnim prvenstvima, a isti ne ubilježe zvanični nastup, bodovat će se kao prvoplasirani kolone „ J“.

Nacionalni rekord treba da bude ostvaren na takmičenjima navedenim u Članu 14.

Rezultat ostvaren na Svjetskim prvenstvima, Evropskim prvenstvima, EYOF-u, Svjetskim kupovima, Mediteranskim igrama, Svjetskom studentskom prvenstvu, Evropskim kupovima se priznaje ako je u konkurenciji pojedinačno ili ekipno učestvovalo minimalno 8 učesnika iz 8 država i da se nalazi u kalendaru krovne evropske ili svjetske federacije.

Rezultat ostvaren na Balkanskim prvenstvima se priznaje ako je u konkurenciji pojedinačno ili ekipno učestvovalo minimalno 8 učesnika iz 6 država.

4. ŽIRI ZA IZBOR SPORTISTE I SPORTSKE EKIPE

Član 16.

Upravni odbor Saveza imenuje sastav Žirija za izbor sportiste godine (6 članova) i to iz redova visokoškolskih ustanova, stručne službe Saveza, sportista, trenera, sportskih radnika i novinara (u daljnjem tekstu Žiri). Član Žirija ne može biti član Upravnog odbora Saveza.

Rad Žirija u istom sastavu je ograničen na samo jedan izbor sportiste godine .

Izveštaj Žirija nije dozvoljen objavljivati prije javnog saopštenja.

Član 17.

Žiri dostavlja izvještaj o radu i odluku o izboru najuspješnijih sportista godine Upravnom odboru Saveza na verifikaciju, najkasnije 3 dana prije zvaničnog proglašenja sportiste godine Odluka o sportisti godine saopštava se javno na prigodnoj svečanosti koju organizuje Sportski savez Grada Mostara.

5. POSEBNA PRIZNANJA

Član 18.

Upravni odbor Sportskog saveza Grada Mostara utvrđuje kategoriju posebno sportsko priznanje „Priznanje Sportskog saveza Grada Mostara“. Priznanje se dodjeljuje na osnovu prijedloga članica Saveza ili Žirija, a kandidati su sportaši/sportašice, sportske ekipe i sportski radnici, koji postižu vrhunske sportske rezultate, koji kroz svoje nastupe (pojedinačne, ekipne, klupske i reprezentativne) vrše promociju sporta Grada Mostara i Bosne i Hercegovine u svijetu, ali isto tako koji svojim odnosom prema sportu, kolektivu i ponašanjem na i van sportskih terena, na najbolji način promoviraju vrijednosti sporta u cjelini.

Posebno priznanje za ostvarene sportske rezultate može se dodijeliti pojedincima i ekipama koje su ostvarili sportske rezultate u skladu sa članom 14. ovog Pravilnika, a isti nisu izabrani za najuspješnijeg sportistu godine i sportsku ekipu godine.

Pod ostvarenim sportskim rezultatom smatra se da je sportaš/sportašica državni prvak/prvakinja ili da je član reprezentacije Bosne i Hercegovine ili da je postigao rezultat po kriterijima za ocjenu rezultata – član 14. ovog Pravilnika.

Član 19.

U cilju razvoja sportskog duha, sportske tolerancije i uvažavanja, poštene igre i odgoja u cjelini, Upravni odbor Saveza može dodijeliti posebno priznanje pojedincima i ekipama za Fair play.

Samo neposredni sportski učesnici (sportske ekipe, treneri, sportisti) mogu biti kandidati za ovo priznanje.

Prijedlog za dodjelu priznanja fair play podnose članice saveza, a Žiri konačni prijedlog upućuje Upravnom odboru Sportskog saveza Grada Mostara na verifikaciju.

Član 20.

Posebno priznanje u okviru invalidnog sporta može se dodijeliti sportašu invalida u muškoj i ženskoj konkurenciji, ekipi u muškoj i ženskoj konkurenciji, te treneru i sportskom radniku koji su ostvarili rezultat na zvaničnim takmičenjima u skladu sa članom 14. ovog Pravilnika. Posebno priznanje se može dodijeliti u kategoriji djece i mladih sa poteškoćama u razvoju, koji su ostvarili rezultat u okviru zvaničnih takmičenjima u organizaciji ili preporuku Specijalne olimpijade BiH.

Član 21.

Posebno priznanje se može dodijeliti i novinarima, medijskim kućama koji u toku godine izvještavaju o postignutim rezultatima mostarskih sportista i stanju sporta, i koji svojim izvještavanjem doprinose promociji sporta.

Član 22.

Posebno priznanje može se dodijeliti pojedincima za naučno istraživački rad u oblasti sporta, a kao kriteriji biti će vrednovani:

- originalnost i inovativnost rada;
- značaj rada za unaprjeđenje i razumijevanje područja istraživanja;
- nivo postignutih rezultata istraživanja

U toku godine može se dodijeliti jedno priznanje u oblasti istraživačkog rada u oblasti sporta . Pored prijave kandidati su obavezni dostaviti svoj rad . U slučaju više prijava imenovati će se posebna komisija koja će biti kompetentna za vrednovanje gore navedenih kriterija.

6. PRIZNANJE ZA ŽIVOTNO DJELO

Član 23.

Sportski savez Grada Mostara jednom godišnje raspisuje poziv za dodjelu priznanja za životno djelo .Kao priznanje za doprinos razvoju sporta u Gradu Mostaru i Bosni i Hercegovini, Sportski savez Grada Mostara je odredio nagradu koju će svake godine dodijeliti pojedincima kao „Priznanje za životno djelo u oblasti sporta“.

Javni poziv se upućuje Klubovima – članicama , a objavljuje se i na WEB stranici Sportskog saveza Grada Mostara .

Član 24.

Pravo predlaganja kandidata za Priznanja za životno djelo imaju pojedinci, sportski klubovi i Upravni odbor Sportskog saveza grada Mostara. Predlagač je dužan prijedlog obrazložiti i potkrijepiti kratkom biografijom i podacima o sportskim aktivnostima predloženog kandidata. Predlagatelj ne može predložiti sam sebe.

Član 25.

Priznanje za životno djelo Sportskog saveza Grada Mostara može biti dodijeljeno pojedincima starijim od 55 godina , a koji ispunjavaju slijedeće uslove:

- sportistima koji su u periodu aktivnog takmičenja postigli vrhunske sportske rezultate kako na međunarodnim, tako i na domaćim takmičenjima, bilo pojedinačno ili u okviru ekipe za koju su nastupali, a poslije prestanka aktivnog takmičenja proveli najmanje 20.godina kao aktivni društveno-sportski radnici u organizacijama i organima sporta ;
- društveno-sportskim radnicima koji su najmanje u periodu od 30 godina aktivno djelovali u organizacijama i organima sporta Grada Mostara, i na taj način značajno doprinijeli razvoju, unapređivanju i omasovljenju sporta i tjelesne kulture u Mostaru;
- stručnim radnicima (treneri, ljekari sportske medicine i sl.) koji su proveli najmanje 20.godina rada u organizacijama i organima sporta Grada Mostara i ostvarili izuzetno značajne i zapažene rezultate svjetskog, evropskog i državnog značaja.

Član 26.

Sportski savez Grada Mostara u toku jedne kalendarske godine može dodijeliti 2 priznanja za životno djelo . Priznanje za životno djelo može se dodijeliti jednoj osobi samo jedan put.

Član 27.

Odluku o dodjeli „Priznanja za životno djelo “ donosi Upravni odbor Sportskog saveza Grada Mostara.

Član 28.

Sportski savez grada Mostara vodi evidenciju dobitnika Priznanja za životno djelo.

U arhivi SSGM-a pohranjuje se cjelokupna dokumentacija prispjelih prijedloga za dodjelu “Priznanja”.

7. ZAVRŠNE ODREDBE

Član 29.

Odredbe ovog Pravilnika tumači Upravni odbor Sportskog saveza grada, a za njegovo provođenje zadužen je generalni tajnik Sportskog saveza Grada Mostara.

Član 30.

Izmjene i dopune ovog Pravilnika može vršiti Upravni odbor Sportskog saveza Grada Mostara.

Član 31.

Ovaj Pravilnik stupa na snagu danom donošenja, te prestaje da važi Pravilnik broj: 02-2-1-579/16 od 17.11.2016 godine.

Broj: 05-2-1-466/25

Mostar, 20.11.2025 godine



Predsjednik Upravnog odbora

Ekrem Čolakhodžić